

11

# BAPTISMVM P E R ARENAM

AD NICEPH. H. E. LIB. 3. C. 37.

D. O. M. A.

P R A E S I D E

JO. ANDR. SCHMIDIO

ABBATE MARIAEVALLENSI

S. S. THEOL. D. EIVSD. ET ANTIQ. SACR. P. P. O.  
ORDINIS SVI SENIORE

DILVET

ATQVE EVNDEM

PVBLCO COMMILITONVM EXAMINI

SVBMITTET

IN J V L E O M A J O R I

A. & R.

MARTIN. ERNESTVS BANDAV

CLETZENA-LVNEBVRGICVS

D. XX. MAJI

---

HELMSTADII

RECVS. APVD SEBASTIANVM BVCHOLTZIVM

M D C C X X V I I





Dhuc M. Aurelio Antonino imperium administrante, quod tum accidit, non prætereundum est silentio. Judæus enim quidam in solis aridisque locis iter faciens, communiter cum viatoribus christianis psalmos canebat. Quum vero morbo repentino ita affligeretur, ut crederetur moriturus, atque ibi in locis illis permansurus esse, magna contentione viatoribus suis obsecrando institit, ne eum ita præsidio omni destitutum relinquerent, sed ut divini lavacri participem facerent, ac deinde abirent. Ut autem illi, neque qui præstare hoc posset, (sacerdote enim opus erat) neque aquæ copiam adesse, quæ in baptismo perficiendo & consuetudine antiqua & lege certa & inviolata requirerentur, causati sunt, & propterea in tantarum rerum penuria petitioni ejus non annuerent: Judæus porro in sententia sua permansit, & jurejurando eos, ut sibi satisfacerent, adegit. Illi itaque de tractis homini vestibus, arena quæ ibi erat, pro-

„aqua usi, in nomine patris & filii & spiritus S. tertium arena in eum coniecta, baptizarunt. Per hanc tam insolitam & admirandam sacrorum mysteriorum initiationem, imbecillitate omni, tantquam vinculo quodam, is solutus, longe melius, quam illi validus jam prorsus iter fecit. Postquam autem domum sunt reversi, rem eam ad Dionysium Alexandriae episcopum retulerunt. Ille vero admiratione stupens, ecclesiam de ea consuluit. Cui visum est, aqua insuper ad eum initium, juxta ecclesiae traditionem abluendum esse: ut ita, quod sacro ei deesset, sarciretur. Casum hunc de baptismo per arenam refert Nicephorus Callistus in historia ecclesiastica libro tertio capite septimo ultra trigessimum.

Nicephorus Callistus, Callisti Xanthopuli filius, seculo XIV. clarus, XXIII. libros historiae ecclesiasticae graece scripsit, quorum tamen hodie non nisi XVIII. priores extant, qui a nato Christo usque ad Phocæ Imp. interitum progrediuntur. Quod unicum duntaxat exemplar credatur superfuisse ex bibliotheca Budensi Cpolim & inde per varios casus in Cæsaream delatum, a Joanne Langio ad mandatum Imperatoris in latinam linguam translatum, ex ipsius Langii præfatione ad Ferdinandum Cæsarem passim autores memorant. Id vero tacere non possumus, quod fabulis putidissimis & quisquiliis ubique fere intertextis historiam vitaverit. (a) Unde Theodorus Beza in notis ad evangelium

---

(a) Cave H. L. app. p. m. 29. seq.

gelium Lucæ, historiam ejus, *magnum nugarum volumen*, & ad Aëtorum caput primum ipsum auctorem ineptum ac ridiculum *historiæ ecclesiasticæ scriptorem*, Lambertus Danæus ad Augustinum de hæresibus magnum aliorum scriptorum compilatorem & *παράδοξον* vocant. Isaaco Casaubono (a) audit auctor, *vanissimus, futilissimus, fabulosissimus, nec συγγρηφίς*. Sed *μυθῶν καὶ λήγων ἱερωδῆς*; cui ipse Baronius, quoties animum intendit, fidem omnem abrogat. Et alibi (b) scribit: *Nicephorum hunc fabulosissimum esse scriptorem, & judicii in literis nullius, satis notum est eruditis, & nos supra monebamus. Quare equidem quicquid apud illum legitur, nisi alia accedat auctoritas, non pluris facio, quam folia farfari.* Quos idem errores illius historici notet circa miraculum in Cana factum, (c) nunc non tangimus. De hæresi Agnoëtarum eundem contra omnium veterum scriptorum relationes, quodam illius seculi crepusculo occoecatam, vel proprio errore abreptam, quadam narrasse, veteribus ipsique Nicephoro repugnantia, ostendit Jo. Forbesius, (d) qui eum in historia de Abgaro manifeste falsarium deprehendit. (e) Nec Jo. Bapt.

- 
- (a) Exercit. I. ad Anal. Baron. sect. XII. p. 84. add. exercit. XVI. sect. X. p. 405.  
 (b) Exerc. I. sect. XVII. p. 95.  
 (c) Exercit. XIII. sect. XX. p. 245.  
 (d) Instruēt. histor. theolog. lib. 3. cap. 19. §. 29. p. III. 125.  
 (e) Ib. lib. 7. cap. 8. §. 3. & 6. p. 342. seq.

Cotelerius S. I. (a) sine nota dimittere potuit Callistum, errorem observans crassum atque immanem, quasi Origenes scripserit adversus Marcellum & Porphyrium. Andream Hyperium, (b) virum in his quoque dijudicandis peritum, audire lubet, sequentia differentem : *Nemo autem plura hujus generis corrafit, quam Nicephorus Callistus, homo nimirum juvenis. Fatetur namque se exorsum historiam etate juvenili : eandemque, quum nondum esset annum tricesimum sextum egressus, absolvisse. Præterea vitæ genus amplexatus negotiorum & graviorum actionum prorsus expertus, monachus videlicet, atque ex sue sortis hominibus haud dubie pleraque, quæ in lucubrationes suas retulit, edoctus. Interea autem dum de se ipso prædicat, plurima esse a se congesta, quæ alii ante ipsum scriptores præterierant, equidem vereor, ne qua parte aucupator egregiam laudem diligentia, priusquam banc adipiscatur, in crimen incurrat imprudentia aut levitatis. Quæ namque & senes & episcopi, Eusebius inquam, Theodoretus & similes, a quibus & solis describi historias ecclesiasticas conveniebat, consilio adhibito & sapientia singulari abjecerant, ceu ad ecclesias instituendas inutilia, aut plane incerta confictaque, arbitratus est Nicephorus juvenis & monachus facturum sese operæ pretii-*

- 
- (a) Tom. III. monument. græc. eccles. in not. p. 630. confer. p. 635. ubi eum contra judicium, juxta tamen morem, Sozomenum exscripsisse dicit.
- (b) De ratione studii theologici lib. 4. cap. 2. observat. XL p. 584.

*pretium, si illa suis infarciret collefaneis. Cui adhuc subjungemus Joachimi Camerarii (a) judicium: Sunt ista potius nuga indigna christiana disciplina. Cujusmodi verbosa levitate complures narrantur a quodam Nizephoro Callisto, autore sane futili, qui undecunque acceptas fabulas a pura doctrina ecclesiastica abhorrentes intexuit narrationibus historiae suae. Eadem in eo cognoscit Gerh. Jo. Vossius, (b) qui tamen ætati, qua vixit, quædam tribuenda esse iudicat: Videlicet propter fabellas complures & errores non exiguos, quos in eo etiam Baronius, Possevinus atque alii observarunt. Sed ætatem cogitemus qua vixit. Pro qua, dictione usus non invenusta. Ordine non incommodo priorum historiam digessit. Labbeus (c) autem majori supercilio Casauboni temeritatem (ut ait) damnans, illius panis purpuram aliquando intextam ex auctoribus, qui periere, existimat, prudentisque censet lectoris, pretiosum separare a vili, & gemmas e sterquilinio colligere.*

Talis ergo cum Nicephorus habeatur fere ab omnibus, cujuscunque etiam professionis hominibus, dubium forte alicui suboriri poterit, an historia supra recensita ex eo fidem aliquam mereatur, vel

(a) In cap. XI. Johannis p. 267. addatur Jo. Pappus in epit. H. E. p. m. 51. B. Sagittarius introd. in H. E. cap. 7. p. 38. seqq. B. Calixtus conc. Evangel. p. 3. & 58.

(b) De histor. græc. lib. 2. cap. 29. p. m. 308.

(c) Diff. hist. script. eccles. quos attigit Bellarminus tom. 2. pag. 102.

vel an potius ad reliquas referenda sit fabellas, cum forte alia non videatur accedere autoritas? Sed adhuc alium nominare possumus, seculi undecimi scriptorem Georgium sc. Cedrenum, in compendio historiarum (a) idem factum narrantem: M. Antonini imperio, quidam Ebræus per solitudinem, iter cum christianis faciens, cum in gravem morbum delapso jam vitæ discrimen impenderet, christianos per Dei nomen obtestatus est uti se baptizarent. Cum vero neque aqua ad manum esset, neque sacerdos christianis, vestibus hominem nudarunt, & ipsorum quidam manibus arenam hauritam tertium ejus capiti infudit, tertium dicens: Baptizatur Theodorus in nomen Patris, & Filii & Spiritus S. Atque ille Ebræus simul atque ita baptizatus est, confestim morbo suo prorsus est liberatus. Postquam Alexandriam pervenerunt, res ea Dionysio Papæ ad dijudicandum exposita est, is hominem denuo aqua baptizari jussit: atque eum qui arena illum baptizaverat, diaconum, ut ea munere dignum, delegit. Neque hoc injuria. Magnus enim Gregorius baptismorum genera sic enumerat: *Baptizavit Moyses aqua, atque ante nubem & mari. Baptizavit & Joannes non jam Judaico more, neque sola aqua, verum ad resipiscentiam. Baptizat & Jesus, sed spiritu: ea est perfectio. Novi & quartum baptismum, qui fit, cum ob veritatis confessionem sanguis funditur. Novi & quintum, per lacrymas.* Ergo quia nihil horum

---

(a) p. m. 206. edit. a Guil. Xylandro curatæ.



rum fuit, jufte non eft receptus. Si de autoritate Cedreni a nobis quædam defideret lector, ei Xylander in præfatione refpondet, *neque optimo ordine ea præponit, quæ in facris literis, & Flavii Jofephi antiquitatis Judaicæ descriptione, atque alibi copiofe describuntur: & inferit multa, nescio quam relatu aut creditu digna: & interpolatis narrationibus sæpe, sæpe mutilatis, aliquando idem non fine tædio & odio inculcat.* Poft pauca interjecta nihilominus addit plurima efle in Cedreni hoc opere, *quæ cum alibi non inveniantur, maximam ei apud omnes veritatis & hiftoriæ autores conciliare poffint debeantque gratiam.* In Juftiniano præfertim magno, in Heraclio, & aliis deinceps Constantinopolitanis Imperatoribus, multo eft, quam ipfe Zonaras fuerit, diligentius ac copiofius verfatus describendis, annis etiam fingulis res gefas dividens. Nam quæ ante novæ Romæ ortum habet, ea videtur utcunque ex variis libris non magna cura ac judicio perexiguo confarcinaffe. Scalligero, fub initium notarum ad Eufebii chronicon, *idiota eft, ejusque totum opus ftabulum quifquiliarum, & cento ex multis pannis, fordidis, purpureis, malis, bonis, integris, laceris confutus.* (a) Talis ergo cum & Cedrenus fit, nec ab eo cafui noftro aliquam conciliabimus autoritatem, nifi antiquiores producere poterimus autores.

Ponamus tamen alium fide dignum autorem adduci non poffe, qui factum illud referat. An non quotidie talia fieri folent, quæ, nifi oculis noftreis

B

ufur-

---

(a) Conf. Guil. Cavé H. L. p. m. 612.

usurpassemus, ex aliorum relatione valde dubia nobis essent. Quæ non fuere in veterum scholis sententiæ, de quibus certe hodiernum dubitarem, nisi posterior ætas nostris quoque temporibus easdem reduxisset? Quæ non absurda veterum hæreticorum dogmata a patribus aliisque scriptoribus ecclesiasticis notata novimus, quæ multis scrupulum movere possent, an unquam ita fuerint ab hominibus sanæ mentis proposita, nisi eadem videremus in doctoribus quarundam sectarum suas pati revolutiones? Quæ igitur circa scienda & credenda posse accidere, imò revera accidisse observamus, cur non similia circa agenda contingere posse, imò reapse contigisse credamus? Cogitemus modo illum, qui baptismum per arenam postulavit, hominem Judæum, rerum nostrarum, mysteriorum maxime, ignarum. Reliquos viatores si cogitamus, erant illi quidem christiani, sed de necessitate baptismi nondum satis informati, atque hinc Judæi dubiis ac precibus occurrere nescientes. Hoc rerum statu facile fieri potuit, quod factum fuisse supra retulimus. Fingamus ergo saltem talem casum apud illos, qui omnia antiqua in dubium vocare solent, ne diutius a præsentis casus examine retrahamur. Quamvis autem plura sub incudem revocanda essent, sequentia tamen præcipue nostram merentur considerationem: 1. an tanta sit baptismi necessitas, ut nemo eo, in casu necessitatis, sine salutis periculo carere possit? 2. an non liceat tali in casu, absente ecclesiæ ministro, laicis quoque baptismum administrare? 3. an alia, præter aquam naturalem, licite ad-

mula

hibeatur materia, e. gr. arena, illa deficiente? 4. an si spurio illi baptismo, per arenam & solenni formula peracto, superaddatur saltem immersio in aquam vel aquæ asperio, legitimus dein fiat baptismus? & an Judæus potuerit dici rite baptizatus?

Primum ergo momentum quod concernit, *an tanta sit baptismi necessitas, ut nemo adultorum eo, in casu necessitatis, sine salutis periculo carere possit?* Agnoscimus necessarium esse baptismum necessitate præcepti, *euntes docete omnes gentes, baptizate eos in nomine Patris, & Filii & Spiritus S.* Matth. 28, 19. *qui crediderit & baptizatus fuerit, salvus erit* Marc. 16, 16. Nec aliud volunt verba Christi ad Nicodemum: *Amen, amen, dico tibi: nisi quis renatus fuerit ex aqua & Spiritu, non potest introire in regnum Dei* Joh. 3, 5. quibus respondet quoque mandatum apostoli: *pœnitentiam agite & baptizetur unusquisque vestrum, in nomine Jesu Christi, in remissionem peccatorum.* Act. 2, 38. Præter illam etiam non negamus necessitatem medii & in specie expedientiæ, dum per hujus sacramenti usum in adultis fides ex verbo jam concepta obfignatur & confirmatur; imo non duntaxat tunc, quando baptismus suscipitur, sed & postea per omnem vitam, fidelibus efficaciter prodest ad confirmationem fidei & renovationem ulteriorem. Eo tendit B. Chernitius (a) sequentem in modum scribens: *Cum ex verbo Dei constet, Deum illa ad sublevandam infirmitatem nostram instituisse: atque divitias bonitatis sue, ad procurandam salutem nostram*

B 2

stram

(a) In exam. C. T. part. 2, p. m. 17.

stram ostenderet, instituisse ipsum talia organa seu instrumenta, in quibus virtute & operatione Spiritus S. fides nostra quamvis languida & infirma, gratiam apprehendere & obfirmatam retinere posset ad salutem & vitam æternam. Necessaria igitur sunt sacramenta ratione infirmitatis fidei nostræ, cui hujusmodi adminiculis opus est, & ratione institutionis divine, quam Deus hoc consilio & in hunc finem instituit, ut per ea credentibus exhibeat, applicet & obfirmet beneficia melioris ad salutem: ea certe nec inutilia nec supervacanea, sed necessaria sunt. Necessitatem vero exigentiæ eamque absolutam si quis urgeat, quasi sine baptismi usu salus æterna obtineri nullo modo possit, eam admittere non possumus; cum Deus non ita huic medio sit alligatus, ut absque eo non aliis modis salutem nostram consummare & perficere possit. Dari enim casus possunt inevitabiles, quibus adultus desiderium quidem habet baptismum suscipiendi, & tamen illius actu particeps fieri nequit. Quid non in primitiva ecclesia illis contingebat, quando inter catechumenos ad percipienda fidei christianæ capita aliquandiu stare illos oportebat? quo temporis tractu nonnunquam fiebat, ut vel in persecutionibus ad necem abriperentur, vel alia fortuna obirent? baptismo nondum potiti. Et qui non alii poni possunt necessitatis casus, in quibus usum sacramenti *non contemptus religionis, sed articulus necessitatis excludit*, ut loquitur Augustinus. (a) Neque enim defectus, sed contemptus

---

(a) Lib. 4. contra Donatist. cap. 22.

*semper sacramentorum damnat, docente Bernhardo.*

(a) Et si quis ex incuria & negligentia illa omittit, verendum omnino est, ne Deus illi subtrahat auxilia ad operandum, utpote scienti & habenti media opportuna & illorum usum negligenti; secus vero se habebit in eo, qui ex auditu verbi habet fidem veram, & si habere posset baptismum, ambabus illum amplecteretur manibus. *Sed si quis, scribit Chemnitius l. c. ex auditu habeat veram fidem in Christum: & non concedatur ipsi facultas, ut possit sacramentis juxta institutionem divinam uti: in tali certe casu non est statuenda præcisa necessitas sacramentorum ad salutem: ut propterea salus illis denegetur, quibus non datur facultas utendi sacramentis, licet in verbo fide apprehendant Christum mediatorem.* Qui in deserto nati fuerant, per annos 40. non erant circumcisi, propter continuas peregrinationis jactitationes, quæ facultatem circumcisionis accipiendæ non concedebant.

Et tamen non est dubium, quosdam ex illis per 40. illos annos in deserto mortuos fuisse: quos nemo damnaverit, si Deo fide in promissionem de venturo Messia reconciliati fuerunt. Latronis in cruce exemplum aliquot in locis urget Augustinus contra Donatistas:

(b) *Latronis exemplum etiam atque etiam considerans, invenio non tantum passionem pro nomine Christi, id quod ex Baptismo deerat, posse supplere:*

B 3

*sed*

(a) Ep. 77.

(b) lib. 4. cap. 22. seqq.

*sed etiam fidem, conversionemque cordis, si forte ad celebrandum mysterium baptismi, in angustiis temporum succurri non potest. Neque enim latro ille pro nomine Christi crucifixus est, sed pro meritis facinorum suorum: nec quia credidit passus est; sed dum patitur credidit. Quantum itaque valeat, etiam sine visibili sacramento baptismi (id quod ait Apostolus: Corde creditur ad justitiam, ore autem confessio fit ad salutem) in illo latrone declaratum est: sed tunc impletur invisibiliter cum mysterium baptismi non contemptus religionis, sed articulus necessitatis excludit. Cap. XVIII. Latro ille non tamen omnino, sine sanctificatione baptismi, qua corporaliter adhibetur, fuit: quia non ejus accipiendae voluntas defuit, sed non accipiendae necessitas affuit. Cap. XXIV. In illo latrone quod ex baptismi sacramento defuerat, complevit omnipotentis benignitas: quia non superbia vel contemptu, sed necessitate defuerat.*

Veteres ergo ecclesiae doctores eam foverunt sententiam, quod votum & desiderium sumendi baptismi pro re ipsa & baptismo habendum sit. Id quod in exemplo Valentiniani Imperatoris perspicue magis docet Ambrosius. Cum enim Imperator catechumenus adhuc decessisset, ita de eo sentiebat & loquebatur: (a) *Quem regeneraturus eram, amisi, veruntamen ille gratiam, quam poposcit, non amisit.* Sorores etiam Valentiniani, fratrem in isto catechumeni statu obiisse immoderatus ferentes, ita sola-

---

(a) Oratione funebris de obitu Valentiniani.

solabatur : *Audiui vos dolere, quod non acceperit sacramenta baptismatis. Dicite mihi ; quid aliud in nobis est, nisi voluntas, nisi petitio ? atqui etiam dudum hoc votum habuit, ut antequam in Italiam venisset, initiaretur, & proxime baptizari se a me velle significavit. Non habet ergo gratiam, quam desideravit ? non habet, quam poposcit ? & quia poposcit, accepit : & ubi illud est : justus quacunque morte praeventus fuerit, anima ejus in refrigerio erit ? Solve igitur pater sancte munus servo tuo, quod Moses dum in spiritu vidit, accepit, quod David, qui ex revelatione cognovit, emeruit. Solve inquam servo tuo Valentiniano munus quod concupivit, munus quod poposcit sanus, robustus, incolumis, si affectus aegritudine distulisset, tamen non penitus a tua misericordia esset alienus, qui celeritate temporis esset, non voluntate fraudatus. Solve ergo servo tuo munus tuae gratiae, quam ille nunquam non rogavit, qui ante diem mortis templorum privilegia negavit insurgentibus, quos revereri posset. Astabat virorum caterva gentilium, supplicabat senatus, non metuebat hominibus displicere in Christo. Qui habuit spiritum tuum, quomodo non accepit gratiam tuam ? aut si qua solenniter non sunt celebrata mysteria, hoc movet ? Ergo nec martyres, si catechumeni fuerint, coronantur ? Non enim coronantur, si non initiantur. Quod si suo abluuntur sanguine, & hunc sua pietas abluit & voluntas.*

Cum igitur tanta non detur baptismi necessitas, ut nemo adulatorum eo, in casu necessitatis, sine salutis periculo carere possit, id agere debuissent viatores

tores, si modo hujus rei cognitionem habuerint, ut Judæo monstraretur, neque rationem disciplinæ christianæ permittere, neque rem ipsam exigere in tali casu baptismum. Non illam, cum leges ecclesiasticæ certum præscribant tempus, quo prius quis informari debet in fundamentalibus fidei capitibus, antequam admittatur ad baptismum. Non hanc, cum isto rerum statu fides in Christum, ex auditu concepta, omnia illa beneficia, quæ per baptismum alias conferuntur, certo exhibere valeat. Si vero excepisset Judæus instare nunc mortem, tempus amplius non superesse, ut catechumenorum ordini inferatur, succurrendum sibi potius esse lavacro christianorum, ne excluderetur regno cælorum; tunc alterum fuisset urgendum, in illo necessitatis articulo sufficere desiderium baptismi, si ob defectum substantialis alicujus re ipsa is obtineri nequeat: contemtum damnare, non privationem: habere illum fidem, quæ verbum promissionis apprehendens, etiamsi articulo necessitatis a baptismo excluderetur, nihilominus certo statuere possit, se accipere & possidere Christum, gratiam Dei & vitam æternam. Evangelium enim est potentia Dei ad salutem omni credenti Rom. 1, 16. & spirituale semen, ex quo renascimur 1. Petr. 1, 23.

Alterum momentum, quod considerandum nobis summus, eo redit: *an non liceat, absente ecclesiæ ministro, in casu extremæ necessitatis, laicis quoque baptismum administrare?* Ordinarie, ad quos ministerium verbi spectat, ad eosdem etiam pertinet sacramentorum ministerium. Hinc quoque  
utrum.



utrumque apostolis committitur Matth. 28, 19. Marc. 16, 15. *euntes docete omnes gentes, & baptizate eos in nomine Patris & Filii & Spiritus S.* Accedit & illud, quod ministri ecclesiæ sint *dispensatores mysteriorum divinatorum*, ad quæ cum primis pertinent sacramenta ab illis dispensanda, I. Cor. 4, 1. Cum vero dari possint loca & tempora, in quibus ordinarius ecclesiæ minister adesse nequit, ita ut infanti ad ultorve absque baptismo vel moriendum, vel a laico illi baptismus conferendus sit, si substantialia modo ad manus fuerint, certe hoc potius eligendum erit quam illud. Et si enim, quemadmodum supra jam fuit observatum, Deus baptismo non ita sit alligatus, quo minus etiam citra illum in extremo necessitatis casu nos regenerare possit; nihilominus nobis incumbit necessitas mandato divino de administrando baptismo obsequendi & illius substantialia, ubicunque habere possunt, secundum Dei verbum rite applicandi. Urgent protecto & nos verba Christi: *Amen amen dico vobis, nisi quis fuerit genitus denuo, non potest videre regnum Dei:* quæ paucis interjectis iterata vice, additis quibusdam explicationis gratia, inculcare voluit: *Amen amen dico tibi, nisi quis fuerit genitus ex aqua & spiritu, non potest introire in regnum Dei* Job. 3, 4. seq. Solent nonnulli & illud urgere, quod ipsi apostoli, quos tamen Christus ad docendum & baptizandum in totum orbem miserat, non solum per se ipsos, sed etiam per alios baptizasse legantur. Sic Act. 10, 47. respondit Petrus, *num quisquam aquam prohibere potest, quo minus baptizentur isti, qui spi-*  
C *ritum*

*ritum acceperunt sicut & nos ? Et praecepit eos baptizari in nomine Domini.* Verum enim vero cum posteriora verba indefinita sint, vel eo modo intelligi debent, quod Petrus novos fideles ad baptismum suscipiendum hortatus fuerit ; vel si maxime Petrus per alios baptismum illis contulisset, fieri id potuit per evangelistas, presbyteros vel diaconos, quos apostoli saepe habuere comites. Id potius monebimus, Aquilam & Priscillam Act. XVIII, 26. in docendo verbo privatam operam locasse, quæ adeo non fuit improbata, ut Apostolus illum & illam inter *αὐτοὺς* & coadjutores suos referre non erubuerit Rom. 16, 4. Cur ergo non absente ministro ordinario baptismum administrare possent laici ? *imo majori jure & facilius mulieres ( laici ) baptizare poterunt quam docere, cum illud non requirat tot ingenii doctrinaeque dotes, quam hoc ; illud etiam non sit ita proprium apostolorum munus, quam hoc, docente id apostolo 1. Cor. I, 17. ubi dicit, non misit me Dominus baptizare sed prædicare. (a)*

Nec alia mens fuit primitivæ ecclesiæ doctoribus, quos inter primo loco nomino Tertullianum, rigidum alias christianæ disciplinæ observatorem, qui distincte docet, quid ordinarie competierit ministris ecclesiæ, & quid extra ordinem licuerit quibuscunque aliis fidelibus. (b) *Supereſt, inquit, ad*

---

(a) Sunt verba disput. inaugural. sub B. Calixto de baptismo habitæ §. 49.

(b) Libr. de baptismo cap. 17. p. m. 280.

ad concludendam materiolum de observatione quoque dandi & accipiendi baptismum commonefacere. Dandi quidem habet jus summus sacerdos, qui est episcopus. De hinc presbyteri & diaconi, non tamen sine episcopi auctoritate propter ecclesie honorem. Quo salvo, salva pax est. Alioquin etiam laicis jus est. Quod enim ex aequo accipitur, ex equo dari potest, nisi episcopi jam aut presbyteri, aut diaconi vocantur, dicentes, Domini sermo non debet abscondi ab ullo: Proinde & baptismus aque Dei census ab omnibus exerceri potest: sed quanto magis laicis disciplina verecundiae & modestiae incumbit, quum ea maioribus competat, ne sibi adsumant dicatum episcopi officium episcopatus. Emulatio schismatum mater est. Omnia licere dixit sanctissimus Apostolus, sed non omnia expedire. Sufficiat scilicet in necessitatibus ut utaris, sicubi, aut loci, aut temporis, aut personae conditio compellit. Tunc enim constantia succurrentis excipitur, quum urget circumstantia periclitantis. Quoniam reus erit perditioni hominis, si supersederit prestare, quod libere potuit. Integrum Tertulliani locum exhibere volumus, quia alias mutilate, nunc pro hac nunc pro illa citari solet sententia, nullum amplius nobis relinquens dubium, de facultate baptizandi laicis etiam concessa in necessitatibus. Jungamus illi Hieronymum sequentem in modum (a) ea de re scribentem: Ecclesiae salus in summi sacerdotis dignitate

(a) Advers. Luciferianos cap. 4. Tom. 3. p. m. 63. D.

tate pendet : cui si non exsors quadam & ab omnibus eminens detur potestas, tot in ecclesiis efficientur schismata quot sacerdotes. Inde venit, ut sine chrismate & episcopi iussione, neque presbyter, neque diaconus jus habeant baptizandi. Quod frequenter ( si tamen necessitas cogit ) scimus etiam licere laicis. Ut enim accipit quis, ita & dare potest, nisi forte eunuchus a Philippo diacono baptizatus sine Spiritu Sancto fuisse credendus est. Nec alienus ab hac sententia est Hipponensis præsul Augustinus, dicens : (a) & si laicus aliqua pereuntis dederit ( baptismum ) necessitate compulsus, quod cum ipse acciperet, dandum esse addidicit, nescio an pie quisquam dixerit esse repetendum. Nulla enim cogente neccsitate si fiat, alieni muneris usurpatio est : si autem necessitas urgeat, aut nullum, aut veniale delictum est. Dubitanter hoc in loco Augustinum loqui putat Andreas Riverus. (b) Sed, cum adversario dum in arenam descendit, dubitatio illa per absolutam negationem explicari debet. Quæ vero postea disjunctive subjicit, ita explicanda erunt, ut ipse factum tale ex propria hypothefi pro nullo delicto habeat, ex aliorum autem & maxime adversarii veniale duntaxat esse. Citatur etiam Augustinus ad Fortunatum c. in necessitate distinct. 4. de consecrat. In necessitate cum episcopi aut presbyteri, aut quilibet ministrorum non inveniantur & urget

(a) Contra epist. Parmen. lib. 2. cap. 13. Tom. 7. p. m. 9. L. M.

(b) In catholic. orthodox. Tom. 2. p. 32.

urget periculum ejus, qui petit, ne sine isto sacramento hanc vitam finiat, etiam laicos solere dare sacramentum, quod acceperunt, solemus audire. Et ibidem c. Sanctum. Sanctum est baptismum per se ipsum, quod datum est in nomine Patris & Filii & Spiritus S. ita ut in eodem sacramento, etiam auctoritas traditionis per dominum nostrum ad apostolos, per illos autem ad episcopos & alios sacerdotes, vel etiam laicos christianos ab eadem origine & stirpe venientes. Dein subjicitur casus aliquis, sive verus sive fictus: Nam cum illa historia narratur, omnes, qui audiunt, prope ad lacrymas movet. Dum in navi quadam fidelis nullus esset, prater unum paenitentem, cepit imminere naufragium. Erat ibi quidam non immemor salutis suae, & sacramenti vebementissimus flagitator: nec erat aliquis, qui dare posset, nisi paenitens ille. Acceperat enim, sed pro peccato, de quo agebat paenitentiam, amiserat sanctitatem, non amiserat sacramentum. Nam si hoc amittunt peccantes, cum reconciliantur post paenitentiam, quare iterum baptizantur? Dedit ergo quod acceperat: & ne periculose vitam finiret, non reconciliatus, petiit ab eo ipso, quem baptizaverat, ut eum reconciliaret, & factum est, naufragium evaserunt. Cognitum habes, quod fecerunt. Nemo exitit eorum, qui non pium animum ita crederet ut consiliis eorum illo periculo damnari crederet affuisse. Motus enim animus religiosus & supplex ab homine exegit sacramentum, a Deo ipse impetravit sanctitatem. Quod si forte hoc, quod narraui de his, qui naufragio imminente periclitabantur,

*bantur, non vult aliquis credere (non enim hoc scripturarum divinarum auctoritas, sed incerto autore fama commendat) non repugnabo: sed interrogabo, si tale aliquid contingat, quid futurum est? Non enim potest quisquam dicere relinquendum, qui morte imminente baptizari desiderat. Quem baptizatum a penitente quisquis non credit contigisse, oportet, ut credat posse contingere.*

Scimus quidem communiter objici, eorundem esse baptizare, quorum est docere. Sed taceamus nunc exempla Christi, docentis quidem non autem baptizantis nisi per discipulos Joh. 4, 2. & Pauli scribentis, se ad baptizandum a Christo non esse missum, 1. Cor. 1, 17. ex quibus manifestum esse putamus, tam arctum inter docendi & baptizandi minus nexum non esse, qui mutari nullo modo possit. Dein, quemadmodum docendi & baptizandi partes ordinarie ad ministerium spectare concedimus, sic si extremo necessitatis articulo docendi munus homini laico, absente ministro ordinario, non denegatur, non videmus qua ratione, iisdem positis circumstantiis, facultas administrandi baptismum eidem negare debeamus. Neque illud moramur, quod Marcion mulierculis baptizandi potestatem fecerit, (a) cum is ordinarium illarum munus esse voluerit baptismum conferre, a quo in totum nos abhorremus. Nec porro nos movent canones conciliorum

---

(a) Epiphan. hær. XLII. p. m. 305. B.

ciliorum mulieribus hoc officium denegantes, quale quid etiam facit canon C. concilii Carthaginensis IV. *mulier baptizare non presumat*; cum & hic intelligi debeat de eo, quod ordinarie, præsentibus ecclesiæ ministris, extra necessitatis casum, fieri non debet, suadente hanc explicationem canone præcedente XCIX. *Mulier quamvis docta & pia viros in conventu docere non presumat.* Ita ut Rivetus non opus habuerit priorem interpretationem inventum Gratiani appellare. Eodem modo alia patrum loca intelligi debent, quemadmodum & Tertullianus (a) rem omnem ad ecclesiam restringit: *Non permittitur mulieri in ecclesia loqui, sed nec docere, nec tingere, nec offerre &c.* Conf. Præsidis dissert. de muliere in ecclesia.

Non ergo video quid Rivetus velit loco citato, p. 33. verba Basilii (b) urgens: *Qui autem abrupti sunt, laici effecti, nec baptizandi, nec ordinandi habent potestatem*; & ex his exsculpens, juxta Basilii opinionem laicos non potuisse conferre baptismum, & ab his collatum esse iterandum. Verum postquam Basilius, præmissa distinctione inter hæreses, schismata & illegitimos conventus, ostenderit, quosdam in illis constitutos vel rejiciendos esse vel baptizandos, tandem sententiam Cypriani & Firmiliani

---

(a) De veland. virgin. cap. 9. p. m. 223.

(b) Ad Amphilocho, epist. canon. can. prim. p. m. 21. C.

milianum refert, Catharos, Encratitas & alios uni calculo esse subijciendos: quoniam separationis principium per schisma: qui autem se ab ecclesia abjuxerunt non habent amplius in se gratiam spiritus. Defecit enim traditio, quod discissa sit consequentia: qui enim primi recesserunt, ordinationem a patribus habebant, & per manuum impositionem habebant spiritalem gratiam. Qui autem abrupti sunt, laici effecti, nec baptizandi, nec ordinandi habent potestatem, ut qui non possint amplius Spiritus S. gratiam aliis quoque præbere, a qua ipsi exciderunt. Quare eos qui ab ipsis baptizati erant, tanquam a laicis baptizatos, jusserunt ad ecclesiam venientes vero ecclesie baptismo expurgari. Sed quoniam nonnulli Asiaticis omnino visum est propter multorum æconomiam & dispensationem, eorum baptismum suscipi, suscipiatur. Hæc Basilium ex aliorum sententia & consuetudine recenter ita, ut iudicet Cyprianum probasse anabaptismum eorum, qui ab hæreticis fuerunt tincti; & ab ecclesia abruptos, laicos fuisse factos nec amplius habere baptizandi & ordinandi potestatem in ecclesia. Sed nec prior Cypriani sententia placuit Stephano & aliis ecclesiis; nec posterior stare poterit, eos, qui ab ecclesia abrupti sunt quovis modo, statim fieri laicos. Posito autem abruptos fieri laicos, tunc id duntaxat sequitur, in ecclesia ordinarie id munus eos subire amplius non posse, esse potius coercendos, si tale quid susceperint. Si vero quis excipiat, ipsum Basilium in sequentibus idem statuere, dum de Encratitis scribit, oportet nos eorum baptismum abrogare, & si quis



quis ab eis acceperit, eum ad ecclesiam accedentem baptizare. Statim vero addit: *Quod si hoc universali æconomia sit impedimento futurum, rursus consuetudine utendum est & sequi oportet patres, qui, quæ ad nos pertinent, providerunt.* Dein supponit Encratitas, *ut se reddant non suscipiendos ab ecclesia, proprio baptismo præoccupasse.* Si ergo proprium illi habuerunt baptismum, in substantialibus diversum, recte in antecedentibus eos non baptizatos esse dixit, *qui non in nobis tradita baptizati sunt.* Si vero illi, ut idem pergit, *nostrum baptismum servant, hoc ne nobis agre sit: neque enim illis gratiam reddere tenemur, sed canonum exactæ observationi servire.* Id tamen exigit, *ut qui ex illorum baptismo accedunt, ungantur scilicet in fidelibus, & sic ad mysteria accedant.* Ex his pro stabilienda sua sententia Rivetus nihil deducet, cum Basilius nec quorumvis anabaptismum ipse admittat, nec laicis omnem adimat baptizandi facultatem, sive ordinariam sive extraordinariam.

Sed relicto Basilio progreditur Rivetus ad præsentem nostrum casum, & in eo certissima antiquitatis vestigia se reperisse putat, cum expressis addatur verbis, cur præter alia baptismus in itinere administrari non potuerit, nimirum: *sacerdote opus erat.* Baronium non scivisse eludere hoc testimonium, nisi quod dixerit: comites itineris id protulisse, non ex ecclesiasticæ legis præscripto, sed rudi quadam simplicitate & ecclesiasticarum rerum igno-

D

ratio-

ratione. Verum Baronio nihil reposuit ille, nisi quod *rudis hæc simplicitas præstet versutia nimis subtili*, cum hoc modo rationibus illis non satisfaciat. Ignorantiam enim & simplicitatem hominum fuisse nemo negabit, qui vel ipsum baptismum per arenam ab illis administratum saltim cogitaverit. Ad di potest & illud, quod verba ista sunt Nicephori, explicantis rationem viatorum, baptismum, ob defectum personæ ordinariæ administrantis, petenti denegantium. Ex propria autem mente & sui temporis consuetudine Nicephorum hæc scripsisse, credibile vix est, cum græci, morum antiquorum observantissimi, nostris adhuc temporibus concedant laicis baptismum, si extremus necessitatis articulus eum exegerit. Sic enim Metrophanes Critopulus: *necessitate autem urgente statim post natiuitatem baptizatur quod genitum est, & si presbyter non adsit, obstetrix id facit, verba illa divina supra citata pronuncians, & si infans convaluerit, baptismus hic ei sufficit.*

Ex his ergo utrumque agitatæ patet, quod Judæi in itinere comites laboraverint ignorantia ejus, quod ordinariæ a nobis fieri debet, & quod extra ordinem necessitate urgente facere nobis licet. In conventu sive ecclesia & aliis in locis, ubi haberi potest minister ordinarius, per eum, & non per laicum, baptismus administrandus est. Erant autem tum illi in solis aridisque locis constituti, nec in comitatu habentes sacerdotem, neque aliquem ex vicinia

vicinia evocare tam cito valentes. Hoc igitur rerum statu, Judæo in vitæ periculo versanti, potuisset quivis baptismum conferre, si modo illi substantia illa adfuissent.

Tertium momentum, quod ex præsentī casu disquirendum nobis venit, erit illud: *an alia præter aquam naturalem & veram licite adhibeatur materia e. g. arena, illa deficiente?* Certe ipsum verbum baptizare, dum in mandato Christi simpliciter atque sine addito ponitur, immersionem in aquam vel asperisionem aquæ denotat. Accedit, quod baptismus expresse Eph. 5, 26. *lavacrum aquæ* dicatur. Et Christus ipse Joh. 3, 5. ait: *Nisi quis fuerit genitus ex aqua & spiritu;* ubi, ut a nativa vocis significatione recedamus, nulla nos cogit necessitas. Apostoli eorumque socii non alio elemento sunt usi, sicut de Philippo diacono Act. 8, 35. constat. *Cum pergerent in viam, venerunt ad quandam aquam, tum ait ei Eunuchus: En aquam, quid prohibet me baptizari? dixit vero Philippus, si credis ex toto corde, licet. - jussitque fisci currum, ac descenderunt ambo in istam aquam Philippus simul & Eunuchus, & ille baptizavit eum.* Eadem denique fuit praxis totius ecclesiæ ab incunabulis usque ad nostra tempora. Quando autem veram & naturalem desideramus aquam, nobis perinde erit fluvialis illa sit an fontana, calidia an frigida. Eleganter Tertullianus: (a) *Nemo dicat, nunquid*  
D 2 *ipfis*

---

(a) De baptismo cap. 4. p. m. 277.

*ipsis enim aquis tingimur, quæ nunc in primordio fuerunt? non utique ipsis nisi ex ea parte qua genus quidem unum, species vero complures. Quod autem generi adtributum est, etiam in specie redundat. Ideoque nulla distinctio est, mari quis an stagno, flumine an fonte, lacu an alveo diluatur, nec quicquam refert inter eos quos Joannes in Jordane, & quos Petrus in Tiberi tinxit. Nisi & ille Spado, quem Philippus inter vias fortuita aqua tinxit, plus salutis aut minus retulit.*

Cur vero Deo placuerit in baptismo aquam adhibere, non alia nobis suppetit ratio, quam institutoris voluntas sanctissima, quæ legis & rationis instar esse debet. Qui præter hanc alias quærunt, respicere solent ad vaticinia & typos V. T. ad facilem & promptam materiæ hujus parandæ copiam, & ad varias aquæ naturalis proprietates. Ad harum unam Tertullianus (a) digitum intendit: *Quantum ad simplicem actum competat similitudo, ut quoniam vice sordium delictis inquinamur, aquis abluamur.* Ubi obiter cum patribus, Justino M. & Tertulliano, notamus, dæmones Deum in hoc quoque fuisse æmulatos & inter gentiles effecisse, ut sacris aqua adhiberetur. Sic enim ille, postquam de lavacro, quod tunc illuminatio dicebatur, egisset, sequentem in modum scribit:

(a) De baptismo cap. 4. p. m. 277. G.

bit : (a) *Lavationem* hanc cum audissent *dæmones* per prophetam promulgatam, ut & ingressum in delubra eorum, & accessum ad illos, atque libationibus & adipis nidoribus offerendis operaturi, se ipsos aquæ aspersione lustrarent, effecerunt. Quia ut toto quoque corpore laventur prodeuntes, priusquam ad templa, ubi illi collocati sunt, veniant, instinctu & opera sua curant. Tertullianus (b) vero : Sed enim nationes extraneæ ab omni intellectu spiritualium potestatem eadem efficacia idolis suis subministrant, sed viduis aquis sibi mentiumtur. Nam & sacris quibusdam per lavacrum initiantur, *Isidis* alicujus, aut *Mithræ*, ipsos etiam Deos suos lavationibus efferunt. Ceterum, villas, domos, templa, totasque urbes aspergine circumlata aquæ expiant passim, certe ludis *Apollinaribus* & *Pelesis* tinguntur. Idque se in regenerationem & impunitatem perjuriorum suorum agere presumunt. Item penes veteres quisquis se homicidio infecerat, purgatrice aqua se expiabat.

Nunquam vero defuerunt, qui iudicio suo indulgentes, divinam neglexerunt institutionem. Illos inter fuisse. Marci sectatores quosdam (c) (non enim eadem statuebant & faciebant erronei illi)  
D 3 qui

(a) Apol. 2. pro Christian. p. m. 94. seq.

(b) De baptismo cap. 5. p. m. 277. H.

(c) Apud Iren. adv. hæ. lib. 1. cap. 18. p. m. 109.

qui adducere quidem ad aquam servatum esse dixerunt, admiscentes autem oleum & aquam in unum, cum profanis dictionibus, similibus quæ supra prædiximus, mittant super eorum caput, qui sacrantur : & hoc esse redemptionem volunt : ungunt autem & ipsi opobalsamo. Huc quoque spectare Manichæos scimus ex Augustino, (a) qui baptismum in aqua nihil cuiquam perhibebant salutis asserere, nec quenquam eorum, quos decipiunt, baptizandum putabant, quod crederent aquæ creatorem esse malum dæmonem. Seleuciani & Hermiani quoque baptismum in aqua non accipiebant. (b) Causam non exprimit Augustinus. Ea vero est, quod Joannes Baptista, suum & Christi baptismum comparans, diversam faciat materiam amborum; sui quidem aquam, sed Christi, ignem; quemadmodum patet ex Philastrio, qui de hæreticis illis ita scribit : Seleucus & Hermius, hæretici, animas hominum de igne & spiritu esse existimantes, isto baptismo non utuntur, propter verbum hoc, quod dixit Joannes Baptista : Ipse vos baptizabit in spiritu & igne. Doctorem scholasticorum quorundam mens in hoc negotio quæ fuerit, exprimit Guido de monte Rocherii in manuali : (c) In lixivio, inquit, si aqua non posset inveniri, posset fieri

(a) De hæres. cap. 46. p. m. 225.

(b) Augustin. l. c. cap. 59. p. m. 299.

(c) Cap. 2. de baptismi materia.

*feri Baptismus: cum lixivium nihil aliud sit quam aqua collata per cineres: Et propter eandem rationem dicunt aliqui doctores, quod in urina propter defectum aquæ posset baptizari: quod non credo verum: quia urina non est aqua: sed humor resolutus a cibis comestis. Et idem dico de saliva. Sed nonne in brodio carniū posset fieri baptismus, ubi alia aqua non posset inveniri? dicendum est, quod aut tanta resolutio carniū est facta in brodio illo, quod definit species aquæ esse, & est alia species de novo generata, & tum non potest fieri baptismus: aut non est ibi tanta resolutio carniū facta, & tunc fieri potest, & in tali brodio baptizari. Et idem dico de luto; scilicet si aqua exprimat ex illo, in aqua illa expressa posset fieri baptismus. Bezzæ communiter objicitur, quod in epistola secunda ad Thomam Tiliū scripserit: Desit aqua & tamen baptismus alicujus differri cum adificatione non possit, ego certe quovis alio liquore non minus rite quam aqua baptizarim. Rivetus contra Bailium loc. cit. agnoscit esse saltem privatam Bezzæ opinionem, neque eam esse intelligendam de liquore, qui ad maculas corporis eluendas aptus sit, non quo macularetur aspersus, quod de atramento & similibus intelligi nequit. Non repugno tamen, ad id, ut hæc problematica habeantur. Sub finem hujus tractationis scribit: Verum nos, Deo laus, ejusmodi extraordinariis casibus non sumus obnoxii: quorsum ergo de talibus digladiaremur? Quantum autem omnes illi recedant a Christi institutu.*

stitutione & veris ipsius baptismi substantialibus, facile judicari potest, si modo perpendantur ea, quæ de baptismi materia sunt dicta.

Non ergo, ut ad quæstionis nostris momentum regrediamur, arena potest esse materia baptismi, cum de ea neque institutionis neque promissionis verbum habeamus. Deest quoque praxis apostolorum & totius primitivæ ecclesiæ, ita ut dubium sit, an unquam aliud simile acciderit factum.

Sublata autem parte essentiali, non potest salva manere totius essentia, baptismi scilicet. Nullus ergo fuit baptismus per arenam in deserto per comites Judæo adhibitus.

Agnoscit id Rivetus loco eodem, & addit: sed si verum est: rectius in defectu aquæ baptizaretur quis alio liquore, quam arena.

Verum quidem est, arenam plane recedere a natura aquæ, cum ex numero liquidorum esse nequeat, & hac ratione alius liquor propius ad naturam aquæ accederet; sed id primo contra aliorum doctorum reformatorum sententiam est, ceu ex multis unus Bucanus ea de re nobis testis esse potest.

*Materia externa baptismi est, inquit, aqua vera, pura, munda & naturalis, & sine discrimine simplex, vulgaris & obvia, non mixta, non medicata, non facta, non stillatitia, nec alius liquor simplex & vulgaris, non oleum, non sanguis, non ignis, non sabulum, aut aliud quodvis elementum.*

Deinde ipse Rivetus alio in



in loco (a) contra absolutam baptismi necessitatem pugnat, non videmus, cur in defectu aquæ, tanquam partis substantialis, alio debeamus baptizare liquore, cum non damnet quenquam sacramenti privatio, sed contemptus, juxta ea, quæ supra monuimus. Nec est, quod quis in illius gratiam excipiat, præferendum tamen esse baptismum per quemcunque alium liquorem, quam per arenam, nisi simul velit concedere ex duobus malis turpibus eligendum esse minus. Utrumque enim est contra Dei voluntatem: utrumque, si committitur turpe est, ita ut neutrum ex illis præferri queat.

Quantum denique momentum, quod nobis dispiciendum summus, erit illud: *an, si spurio illi baptismati, per arenam & solennem formulam peracto, superaddatur saltem immersio in aquam vel aque aspersio, legitimus statim fiat baptismus, & Judeus dein rite baptizatus dici possit?* Profecto quemadmodum verus baptismus nunquam salutaripotest ille, in quo loco aquæ aliud quoddam externum elementum adhibetur; ita multo minus baptismum dixeris illum, si verba institutionis, in nomine Patris, Filii, & Spiritus S. plane omittantur. Materia enim sive materiale baptismi, quod huic sacramento & aliis actionibus, quæ non sunt sacramenta, commune est, aut esse potest, nondum  
E facit,

---

(a) l. c. tractat. 3. quæst. 3. p. 21.

facit, ut aliquid sit hoc sacramentum; sed præterea requiritur ut forma sive formale, a quo ad actionem, circa elementum illud occupatam, accedente, aut ei unito, actio formaliter habet; quod est sacramentum sive sacramentalis actio. Absente autem forma, quæ dat esse ultimum, determinatum & specificum, res non est id, quod esse debeat. Non ergo verus baptismus est, si vel trina immersio in aquam vel aspersio aquæ fiat sine addito institutionis verbo. Nam *Salvator non quovis modo baptizandum præcepit*, inquit Ambrosius, (a) *sed primum dixit, docete, ac demum, baptizate in nomine Patris, & Filii & Spiritus S. ut ex doctrina recta fides oriretur, & cum fide baptismatis integra initiatio perficeretur.* Et Basilius: (b) *Oportet nos baptizari sicut accepimus, credere autem ut baptizemur, & glorificare denique sicut credidimus Patrem & Filium & Spiritum Sanctum.* Hinc quoque Bonifacio Episcopo Zacharias Papa ait: (c) *Firmissime præceptum est in Synodo Anglorum, ut quicumque sine invocatione Trinitatis mersus fuisset, quod sacramentum regenerationis non haberet, quod omnino verum est: quod si mersus in fontem baptismi quis fuerit sine invocatione Trinitatis, perfectus*

(a) Contra Arianos lib. 3.

(b) Epist. LXXVIII.

(c) De consecrat. dist. 4. can. in synodo.

*Hus Christianus non est, nisi in nomine Patris & Filii & Spiritus S. fuerit baptizatus.*

Dubium quidem alicui esse posset, an in nostro casu præsentis quæstionis tractatio locum habeat, cum Cedrenus referat, Dionysium Papam Alexandrinum, denuo aqua baptizari hominem iussisse. Quæ verba hunc videntur habere sensum, quod Episcopus judicaverit, hominem illum denuo baptizandum esse, baptismo sc. aquæ, in suis substantiis integro. Id quod ex eo etiam apparet, dum Cedrenus scribit, Judæum neque Mosis, neque Johannis, neque Christi, neque Martyrii, nec denique Lacrymarum baptismum recepisse, rebaptizandum ergo fuisse aqua secundum mandatum Christi. Nicephorus certe rem tam distincte & perspicue non proponit, ut omnis scriptori eximatur scrupulus, quando legitur, Ecclesiæ Alexandriae visum fuisse, aqua insuper ad eum initiatum, juxta ecclesiæ traditionem abluendum esse, ut ita, quod sacro ei deesset, farciretur. Si enim juxta ecclesiæ traditionem abluendus erat Judæus, baptismus peragi debebat aqua quidem, sed verbis institutionis non omissis. Si vero illud duntaxat farcendum fuerat, quod sacro ei deerat, verbo neglecto, & insuper habito, aqua sola videtur ablutus. Et hanc fuisse Nicephori mentem putarunt Centuriatores Magdeburgenses, (a) historiam illam ex Calli-

---

(a) Cent. 2, cap. 6. p. m. 80.

sto referentes : Cum igitur scribunt, ad locum suum rediissent, Episcopus Alexandria, ab illis consultus, de sententia ecclesie respondit : Baptizatum esse Judæum, si modo aqua denuo perfunderetur.

Sed quicquid de eo sit, si vel maxime baptismus Alexandrinus in omnibus substantialibus se legitime habuerit, ponamus saltim talem casum, quo priori baptismo, in materia aberranti, sola aqua absque recitatione verborum institutionis fuisset superaddita, profecto asserere necessum habemus, Judæum illum verum baptismum nec prima vice nec altera suscepisse. Defraudatus ergo fuisset Judæus baptismo, quem tam anxie expetierat, non tamen sua, sed aliorum ignorantia & culpa. Quapropter si successu temporis Judæus dubitasset de baptismo suo, & ex dubitationum tenebris tandem emerisset in lucem scientiæ, qua certo cognovisset se rite baptizatum non esse, omnino tertium enimque genuinum baptismum, substantialibus a Deo ordinatis constantem, exigere ab ecclesia potuisset. Si vero per totum vitæ decursum Judæus nunquam dubitasset de baptismo suo, sed potius cum ecclesiæ doctoribus credidisset, omnia legitime in illo se habuisse, non tamen propterea desiisset ecclesiæ esse membrum, aut aliis beneficiis, quibus reliqui in ecclesia fideles fruuntur, caruisset. Haberent enim tali in casu locum illa, quæ Cyprianus in quæstione de baptismo hæreticorum monet : (a) *Sed dicet aliquis*

---

(a) De baptismo contra Donatistas lib. 5. c. 2. p. m. 93. A.

aliquis : *Quid ergo fiet de his, qui in præteritum de heresi ad ecclesiam venientes, sine baptismo admissi sunt ? Potens est Dominus misericordia sua indulgentiam dare, & eos qui ad ecclesiam simpliciter admissi, in ecclesia dormierunt, ab ecclesia sue muneribus non separare. Non tamen, quia aliquando erratum est, ideo semper errandum est, cum magis sapientibus & Deum timentibus congruat, patet facta & perspecta veritati libenter atque incunctantes obsequi, quam pertinaciter atque obstinate contra fratres & sacerdotes pro hereticis reluctari.* Sententia hæc Augustino adeo placuit, ut eam Donatistis integram opponere non dubitaverit, sequentia inter ferens. (a) *Nos autem si ad ecclesiam sine baptismo admittimus, in eo numero sumus, quibus Cyprianus propter unitatis custodiam ignosci posse præsumsit. Si autem sive ut jam, ut arbitror, ex his quæ in superioribus libris diximus, manifestum est, quod etiam in hereticorum perversitate potest esse christiani baptismi integritas, si qui temporibus illi rebaptizaverunt, nec tamen ab unitatis compagine recesserunt, eadem dilectione pacis potuerunt ad veniam pertinere, quæ Cyprianus etiam sine baptismo admissos ab ecclesia muneribus non separari potuisse testatur.* His addantur quæ alibi habet idem, & supra citata evolvamur, de latrone : *Sicut in illo latrone, quod ex baptismi sacramento de-*  

E 3 fuerat,

(a) loc. cit. lib. 4. cap. 24. p. m. 92. B.

*fuerat, complevit omnipotentis benignitas, quia non superbia vel contemptu, sed necessitate defuerat. Liceat nunc nobis ista ad nostrum transferre casum, quem ita accidisse formavimus. Scilicet si Judæus ille aut alii, in ecclesiæ orthodoxæ compagine manentes, non verum acceperint baptismi sacramentum, eo tamen quod illud accepisse censeantur, & adulti etiam seipsos existiment illud accepisse per ministerium ordinarium sive extraordinarium, nulla superbia aut contemptu sacramenti eo carent, sed miseranda quadam ignorantia, quam error publicus fovet, & pacis ecclesiasticæ necessitate, & præsumti reverentia sacramenti, quod sciunt non esse violandum sive iterandum. Ideo non est dubitandum, quin in eis, quod ex baptismi sacramento deest, compleat omnipotentis benignitas. Non tamen, quia aliquando erratum est, ideo semper errandum est.*

Hæc sunt illa, quæ circa præsentem casum disquirenda nobis sumimus. Possent quidem adhuc alia ex Cedreno non minus ac ex Nicephoro vel illustrari, vel ventilari, nisi nobis propositum fuisset, brevitati, quoad licuerat, litare.



F I N I S